

林文忠公政書

恭報抵粵日期摺

奏爲恭報

微臣

行抵廣東日期並遵

旨體察洋面堵截情形恭摺奏祈

聖鑒事竊

臣

上年冬間進京

陛見於十一月十五日欽奉

諭旨著頒給欽差大臣關防馳驛前往廣東查辦海

口事件所有該省水師兼歸節制等因欽此

臣當

卽在京請

訓疊聆

恩諭備極周詳蒙

委任之逾恆彌深感奮念責成之重大倍切悚惶

陛辭後於二十三日出京經由直隸山東安徽皆無

停滯惟江西途次連遇大雪間有未能僦行之

處旋即加緊前進以速補遲茲於正月二十五

日行抵廣東省城與督

臣

鄧廷楨撫

臣

怡良等

會晤當據告知節次掣獲鴉片煙犯水陸交嚴

羣情頗爲警動迨聞

特派查辦之

旨聲威所被震懾民夷是以駐省年久之夷商瞻
於十二月十二日請牌下澳附搭港腳映船回
國其伶仃洋躉船內有港腳噤船及彎吐船二
隻亦於十二月二十八日回去今年正月二十
日又有港腳喊啞及吡噸等船咪喇嚙國嚙哩
啞及吐咖等船噠國啣吐船小呂宋船共十四
隻起碇開行二十一日又有港腳噴啞等船咪
喇嚙國嘛叻等船共四隻與前船一同駛去旋
據探報拋泊了洲洋面該處爲夷船回國必經

之路現仍嚴行探逐業經先後具

奏等語臣復細加查訪均屬相符惟思夷情詭譎
異常現有鴉片在船未必遽甘回國果否計窮
思遁抑係擇地圖遷均未可定第既經開動其
爲畏憚可知亟應宣示

天威乘勢盡行驅逐以爲清源之計除飭外海水師
確查飛稟相機會辦外至臣先於途次承准軍
機大臣字寄上年十二月十六日奉

上諭本日據鄧廷楨奏等調師船將備聯幫駐泊洋

面堵截民夷售私並水陸交嚴以除銅弊一摺著
林則徐馳抵廣東後卽將各該處情形悉心體察
所有摺內所議駐洋守堵各事宜會同鄧廷楨通
計熟籌務臻妥善覈實辦理原摺著鈔給閱看將
此諭令知之欽此

臣查閱摺內所議分派兵哨各
船在伶仃洋一帶按月輪流堵截無論內地何
項船隻駛近夷船概行追擊倘敢逞兇拒捕格
殺勿論其東路之惠潮等屬洋面口岸一體巡
防似此碁布星羅已足以昭嚴密惟現在夷薊

既經移動自須到處跟蹤即使該躉船駛出老
萬山猶恐內海匪船潛赴外洋勾結是杜絕售
私之勁實屬刻不容鬆臣甫經到省於各處島
澳口門尙未親歷現在檢閱圖志先與督撫臣
在省互相請求擬於旬日之間出赴中路之虎
門澳門等處與水師提臣關天培乘船周覽以
便相機度勢通計熟籌俟躉船驅除應手之後
再往東路察看機宜隨時會同鄧廷楨等覈實
辦理總期拔本塞源力迴銅習以仰副

聖主澄清海澨綏戢民生之至意所有

微臣到粵日

期並體察大概情形謹先繕摺具

奏伏乞

皇上聖鑒再廣東陽雨應時米糧平減民情均極安

帖足以上慰

聖懷合併陳明謹

奏

附奏粵省鴉片情形片

再查奸夷啗噸係曠哨喇國所屬之港脚人盤踞粵省夷館歷二十年之久混號鐵頭老鼠與漢奸積慣串通鴉片之到處流行實以該夷人爲禍首伊僅係夷中之一奸販並非該國有職之人祇以狡黠性成轉恃

天朝柔遠之經爲伊護符之計其因售私以致巨富人所共知道光十六年冬間卽經督臣鄧廷楨等遵奉

諭旨查明驅逐而該夷藉稱清理帳目又作兩載逗
遛去冬臣蒙

皇上發交太僕寺少卿楊殿邦等條奏各摺帶來廣
東查辦其摺內所指亦以該夷人爲奸猾之尤
臣於未出京時卽先密遣捷足飛信赴粵查訪
其人以觀動靜聞十二月間廣東省城互相傳
播以爲

欽差大臣一到首挈喧嚷究辦該夷人遂卽請牌下
澳搭船回國是其他則颺去固爲鬼蜮常情要

在使之不敢再來乃爲善策又伶仃洋而躉船
亦於臣將到之時先後開動二十隻雖夷情巨
測難保不游奕往來而其聞知

諭旨森嚴心懷畏懼亦已明甚矣此時查辦機宜惟
有外樹聲威內加慎重陽示鎮靜陰肅防維使
之生嚴憚之心而發悔懼之念然後曉諭禁止
皆非空言至廣東興販吸食之人固倍蓰於他
省然聞

皇上特遣大臣查辦皆有懼心屢經嚴拏之餘興販

者不能不斂戢吸食者亦不能不戒斷惟民情因見從前旋查旋止以爲官禁未必久長不免有觀望希冀之想臣入境後聞民間無不私探罪名輕重與新例之曾否頒行大抵惟生死關頭足以生其震恐如果定論死之例而寬一年之期卽吸食莫多於廣東而以臣察看情形亦可保限外無人羅法若寬而生玩則不惟未戒者不戒卽已戒者亦必復食稍縱卽逝恐不可挽伏乞

聖明乾斷嚴例早頒庶辦理得有把握臣愚昧之見
是否有當謹附片瀝陳伏祈

聖鑒謹

奏

奏爲嘆咭喇國夷人震懾

收恭摺奏

聖鑒事竊照鴉片來自外洋毒流中國蔓延旣久幾
於莫可挽回幸蒙我

乾綱獨斷力除錮弊法在必行且荷

特頒欽差大臣關防派臣林則徐來粵查辦顧茲重大之任慮非閭陋所勝仰賴

諭旨嚴明

德威振疊不獨禁令行於內地且使風聲播及重洋復蒙

諭令臣鄧廷楨等益矢奮勤盡泯畛域下懷欽感倍思併力驅除在臣林則徐未到之先已將窩口煙館興販吸食各犯挈獲數百起分別懲辦又派令各師船輪流守堵水陸交嚴並將東路夷

船及住省奸夷先後驅逐節經奏蒙

聖鑒 臣林則徐於正月二十五日到省亦將會商籌辦大概情形先行具

奏在案維時在洋躉船二十二隻已陸續起碇開行作爲欲歸之勢若但以逐回夷界卽爲了事原屬不難惟 臣等密計熟商竊以此次

特遣查辦務在永杜來源不敢僅顧目前因循塞責查夷情本皆詭譎而販賣鴉片者更爲奸猾之尤此次聞有

開動離卻向來所泊之伶仃等洋以明其不敢
違抗其實每船內貯存鴉片聞俱不下千箱因
上年以來各海口處處嚴防難於發賣而其奸
謀詭計仍思乘間覓售非特不肯拋棄大洋亦
必不肯帶回本國即使逐出老萬山以外不過
暫避一時而不久復來終非了局且內海匪船
亦難保不潛赴外洋勾結售買必須將其躉船
鴉片銷除淨盡乃爲杜絕病源但洪濤巨浪之

中未能確有把握因思躉船之存貯雖在外洋而販賣之奸夷多在省館雖不必遽繩以法要不可不喻以理而怵以威臣林則徐當撰諭帖責令衆夷人將躉船所有煙土盡行繳官許以奏懇

大皇帝天恩免治既往之罪並酌請

賞犒以獎其悔懼之心嗣後不許再將鴉片帶來內

地犯者照

天朝新例治罪貨物沒官等語與臣鄧廷楨怡良酌

商定稿卽於二月初四日公同坐堂傳訊洋商將諭帖發給令其齎赴夷館帶同通事以夷語解譯曉諭立限稟覆一面密派兵役暗設防維查各國買賣以暎咭喇爲較大該國自公司散局以後於道光十六年派有四等職夷人義律到澳門經管商梢謂之領事臣等發諭之後各國則皆觀望於暎夷而暎夷又皆推諉於義律其中有通曉漢語之夷人嚙等四名經司道暨廣州府等傳至公所面加曉諭因該夷嚙等回

稟之言尙爲恭順當卽賞給紅綢二疋黃酒二
罇著令開導衆夷速繳鴉片未據卽行稟覆至
二月初十日義律由澳門進省其時奸夷嘯咆
等希圖乘夜脫逃經臣等查知截回諭責義律
以不能約束之非並照歷屆暎夷違抗卽行封
船之案移咨粵海關監督臣豫堃將各夷住泊
黃埔之貨船暫行封船停其貿易又夷館之買
辦工人每爲夷人潛通信息亦令暫行撤退並
將前派暗防之兵役酌量加添凡遠近要隘之

區俱令明爲防守不許夷人出入往來仍密諭
弁兵不得輕舉肇釁在臣等以靜制動意在不
惡而嚴而諸夷懷

德畏

威均已不寒而慄自嚴密防守之後省城夷館與黃
埔澳門及洋面躉船信息絕不相通該夷等疑
慮驚惶自言愧悔臣林則徐又復疊加示諭勸
戒兼施卽於二月十三日據該領事義律稟覆
情愿呈繳鴉片維時距撤退買辦之期業已五

日夷館食物漸形窘乏臣等當卽賞給牲畜等物二百數十件復向查取鴉片確數經義律向各夷人名下反覆追究旋據呈明共有二萬二百八十三箱查向來掣獲鴉片如係外夷原來之箱每一箱計裝整土四十箇每箇約重三斤每箱應重一百二十斤卽至日久收乾每箱亦約在百斤以外以現在報繳箱數覈之總不下二百數十萬斤若經奸販轉售則流毒何所不至今設法令其全繳不動兵刑無非仰仗

天威自然畏服臣等欽感之餘仍當倍加慎重誠恐

所報尙有不實不盡訪之在洋水師及商賈人等僉稱外夷高大躉船每隻所貯亦不越千箱之數是躉船二十二隻覈與所報箱數不甚相懸當卽諭令駛赴虎門以憑收繳除商明留臣怡良在省彈壓防範外臣林則徐臣鄧廷楨均於二月二十七日自省乘舟二十八日同抵虎門水師提督臣關天培本在虎門駐劄凡防範夷船查禁售私之事皆先與臣等隨時商榷務

台機宜自收繳之諭旣頒尤資嚴密防堵茲遵
船二十二隻陸續駛至虎門口外關天培當卽
督率將領分帶提標各營兵船排列彈壓並先
期調到碣石鎮總兵黃貴署陽江鎮總兵楊登
俊各帶該標兵船分排口門內外聲威極壯粵
海關監督臣豫堃亦駐虎門稅口照料稽查臣
等親率候補知府南雄直隸州知州余保純署
廣州府同知佛岡同知劉開域候補通判李敦
業樂昌縣知縣吳思樹暨副將李賢守備盧大

錢分派文武大小各委員隨收隨驗隨運隨貯
惟爲數甚多一躉船所載之箱卽須數十隻剝
船始敷盤運而自口外運至口內堆貯之處又
隔數十里若日期過促草率收繳恐又別滋弊
端臣鄧廷楨擬收至兩三日後先回省署辦公
臣林則徐自常常駐海口會同提臣關天培詳
細驗收經理一切容俟收繳完竣查明實在箱
數與該夷領事所稟有無參差再行恭摺

奏報並取具各夷人永不夾帶切結存案以斷根

株伏思夷人販賣鴉片多年本干

天朝法紀若照名例所載化外有犯並依律科斷之
語卽予以正法亦屬罪所應得惟念從前該夷
遠隔重洋未及遽知嚴禁今旣遵諭全繳躉船
鴉片卽與自首無異合無仰求

皇上覆載寬宏

恩施法外免追旣往嚴儆將來並求

俯念各夷人鴉片起空無貲置貨酌量

加恩賞給茶葉凡夷人名下繳出鴉片一箱者酌賞

茶葉五斤以獎其恭順畏法之心而堅其改悔
自新之念如蒙

恩准所需茶葉十餘萬斤應由臣等捐辦不敢開銷
至夷人呈繳鴉片如此之多事屬創見自應派
委文武大員將原箱解京驗明再行燒燬以徵
實在是否有當臣等謹會同水師提督臣關天
培粵海關監督臣豫堃合詞恭摺具

奏並錄諭夷原稿并夷稟二件恭呈

御覽伏乞

皇上聖鑒再此次距臣林則徐到省拜摺之後已閱
一月先因籌辦未卽就緒不敢遽行奏

聞惟事經多日恐塵

聖懷茲謹由四百里馳奏合併聲明謹

奏

附呈諭夷原稿並夷稟二件

謹將臣林則徐示諭各國夷商呈繳鴉片取具
永不販賣甘結諭稿並暎咭喇國領事義律兩
次覆稟敬謹繕錄恭呈

御覽

諭各國夷人知悉照得夷船到廣通商獲利甚
厚不論所帶何貨無不全銷欲置何貨無不立
辦是以從前來船每歲不及數十隻近年來至
一百數十隻之多我

大皇帝一視同仁准爾貿易爾纔沾得此利倘一封
港爾各國何利可圖況茶葉大黃外夷若不得
此卽無以爲命乃聽爾年年販運出洋絕不靳
惜

恩莫大焉爾等感

恩卽須畏法利已不可害人何得將爾國不食之鴉
片煙帶來內地騙人財而害人命乎查爾等以
此物蠱惑華民已歷數十年所得不義之財不
可勝計此人心所共憤亦天理所難容從前

天朝例禁尙寬各口猶可偷漏今

大皇帝聞而震怒必盡除之而後已所有內地人民
販鴉片開煙館者立即正法吸食者亦議死罪
爾等來至

天朝地方卽應與內地民人同遵法度本大臣家居
閩海於外夷一切伎倆早皆深悉其詳是以特
蒙

大皇帝頒給平定外域屢次立功之

欽差大臣關防前來查辦若追究該夷人積年販賣

之罪卽已不可姑容惟念究係遠人從前尙未知有此嚴禁今與明申約法不忍不教而誅查爾等現泊伶仃等洋之躉船存貯鴉片甚多意欲私行售賣獨不思海口如此嚴挈豈復有人敢爲護送而各省亦皆嚴挈更有何處敢與銷售此時鴉片禁止不行人人知爲鴆毒何苦貯在夷躉久棹大洋不獨徒費工貲恐風火更不可測也合行諭飭諭到該夷商等速卽遵照將躉船鴉片盡數繳官由洋商查明共繳若干箱

造具清冊呈官點驗收明燬化以絕其害不得
絲毫藏匿一面出具夷字漢字合同甘結聲明
嗣後來船永遠不敢夾帶鴉片如有帶來一經
查出貨盡沒官人卽正法字樣聞該夷平日重
一信字果如本大臣所諭已來者盡數呈繳未
來者斷絕不來是能悔罪畏刑尙可不追既往
本大臣卽當會同督撫兩院奏懇

大皇帝格外施恩不特寬免前愆並請酌予

賞犒以獎其悔懼之心此後照常貿易旣不失爲良

夷且正經買賣正可獲利致富豈不體面倘執
迷不悟猶思捏稟售私或託名水手帶來與爾
無涉或詭稱帶回該國投入海中或乘間而赴
他省覓售或搪塞而繳十之一二是皆有心違
抗帖惡不悛雖以

天朝柔遠綏懷亦不能任其藐玩應卽遵照新例一
體從重懲創此次本大臣自京而承

聖諭法在必行且旣帶此關防得以便宜行事非尋
常查辦他務可比若鴉片一日未絕本大臣一

日不回誓與此事相始終斷無中止之理況寒
看內地民情皆動公憤倘該夷不知改悔惟利
是圖非但水陸官兵軍威壯盛卽號召民間丁
壯已足制其命而有餘而且暫則封船久則封
港更何難絕其交通我中原數萬里版輿百產
豐盈並不藉資夷貨恐爾各國生計從此休矣
爾等遠出經商豈尙不知勞逸之殊形與衆寡
之異勢哉至夷館中慣販鴉片之奸夷本大臣
早已備記其名而不賣鴉片之良夷亦不可不

爲剖白有能指出奸夷責令呈繳鴉片並首先
具結者卽是良夷本大臣必先優加獎賞禍福
榮辱唯其自取今令洋商伍紹榮等到館開導
限三日內回稟一面取具切實甘結聽候會同
督撫示期收繳毋得觀望該延後悔無及特諭
附錄義律兩次覆稟

暎咭喇國領事義律具稟

欽差大人爲恭敬遵諭稟覆事轉奉鈞諭

大皇帝特命示令

遠職

卽將本暎國人等經手之鴉

片悉數清繳一俟大人派委官憲立即呈送如

數查收也

義律

一奉此諭不得不遵自必刻即

認真一體順照緣此恭惟稟請明示現今裝載
鴉片之暎國各船應赴何處繳出至所載鴉片
若干繕寫清單求俟

遠職

一經查明當即呈閱

也謹此稟赴大人臺前查察施行

映咭喇國領事義律敬稟

欽差大人爲遵諭呈單事昨因謹奉大人鈞諭即經

遠職

持掌國主所賜權柄示令本國人等即將

嘆咭喇人所有之鴉片如數繳送

遠職

也現經

遠職

查明所呈共有二萬零二百八十三箱恭

候明示查收緣此謹稟赴大人臺前查察施行

附奏夷人現繳鴉片請暫緩斷絕茶葉大黃片
再^臣等先後承准軍機大臣字寄道光十九年
正月初九日奉

上諭本日據鄧廷楨怡良片奏查辦粵省鴉片煙情
形朕詳加披閱具見肫誠爲國之心惟當此可乘
之機仍應督飭文武員弁趁勢嚴拏毋稍鬆懈務
使根株淨盡銅弊全除林則徐計應早晚到粵該
督等仍遵前旨協力同心盡泯畛域勉之又勉以
副委任至林則徐前此面奏請頒發檄諭曉示外

夷著與鄧廷楨酌商是否可行儻必須頒發著卽
委擬底稿具奏經朕披覽再行檄發等因欽此又

正月二十七日奉

上諭據鄧廷楨等奏通諭各國夷商漸除舊汙並繕
錄論稿進呈朕詳加披閱措詞正大所見亦屬周
到現在外洋拋泊各躉船是否盡數回國其並非
躉船又非進口貨船往來各洋寄碇者能否絕迹
著林則徐會同該督等嚴飭水師各鎮協營調集
師船在各洋面聯幫追捕毋任再有偷漏其窩口

煙館各犯並著通飭各屬搜拏淨盡以絕根株其
茶葉大黃果否爲該夷所必需倘欲斷絕是不堪
以禁止不至偷越之處並著悉心訪察據實具奏
林則徐面奏請頒發各國檄諭著仍遵前旨與鄧
廷楨商酌妥擬底稿具奏經朕披覽再行頒發將
此諭令知之欽此查外洋拋泊各躉船已據遵諭
呈繳煙土現經臣等恭摺具

奏其並非躉船又非進口貨船往來各洋寄碇者
以東路南澳鎮屬洋面爲較多先經臣鄧廷楨

檄飭該鎮會同潮州道府設法防堵業將停泊
舢板夷船八隻驅逐開行於上年十二月二十
七日

奏明在案今春以來復據該鎮先後稟報偶有夷
船駛至長山尾大金門等洋遊奕亦經舟師實
力驅逐全數駛出夷洋此等夷船聞知煙土盡
數繳官無所希冀似可不致再來臣等仍檄飭
該鎮聯幫堵截以絕覬覦並飭潮州道府嚴查
海口以杜偷漏期於粵洋一律肅清其內地窯

口煙館各犯除照舊嚴密查拏外現在民間畏
懼改悔多有願將舊存煙土煙槍等物赴官呈
繳者當於省城分設官局派員驗收並經本省
紳士隨處設局分投勸諭旬餘以來陸續呈繳
甚爲踴躍容俟收有成數另行

奏報至茶葉大黃兩項臣等悉心訪察實爲外夷
所必需且夷商購買出洋分售各路島夷獲利
尤厚果能悉行斷絕固可制死命而收利權惟
現在各國夷商業經遵諭呈繳煙土自應仰乞

天恩准其照常互市以示懷柔所有斷絕茶葉大黃
似可暫緩置議如果該夷經此次查辦之後仍
敢故智復萌希圖夾帶鴉片入口彼時自當嚴
行禁斷並設法嚴查偷越弊端應請於善後章
程內另行籌議具奏至 臣 林則徐面奏請頒外
夷檄諭一節原擬抵粵後與 臣 鄧廷楨悉心商
酌如須頒發自應先擬底稿進呈恭候

訓示嗣思暎咭喇國既有在粵之領事義律及住省
夷人不如就近諭知飭將鴉片悉數繳官躉船

迅速回國現已辦理應手則檄諭該國之處似
可暫緩頒行俟將來奉到部頒罪名新例暨議
定善後章程一併彙同備文照會仍遵節次

諭旨妥擬底稿恭呈

御覽再行頒發所有

臣等欽奉

上諭據實覆陳緣由謹附片奏祈

聖鑒謹

奏

會奏收繳鴉片已逾十分之八卽乘勢清理東
路摺

奏爲虎門收繳夷船鴉片已逾十分之八卽可乘
勢清理東路恭摺奏祈

聖鑒事竊臣林則徐抵粵以後與臣鄧廷楨暨撫臣

怡良公同商酌責令夷人將躉船煙土悉數呈

繳由臣林則徐疊加示諭勸戒兼施旋據嘆咭

喇國領事義律稟明情愿將各船存貯鴉片二

萬二百八十三箱陸續駛至虎門呈繳臣林則

徐臣鄧廷楨卽於二月二十七日自省起程於

二十八日駛抵虎門會同臣關天培督率文武

委員分船收繳業於二月二十九日由四百里

恭摺馳

奏在案惟收繳煙土須將剝船攏近躉船方能盤
運而剝船與躉船高下懸殊或用梯升或用繩
縋登降已形費力迨起至一半之後躉船水迹
浮高須防風浪又必下石壓艙且潮汐時有往
來風信兼多順逆一遇風潮相薄剝船不能駛

傍夷船卽勉強攏近而兩相撞擊損壞堪虞不
得不暫爲停止時當三月風暴正多竟不免有
終日坐守之事臣等同駐海口時刻督催得起
卽起不任延緩查各躉船所貯煙土在正艙者
皆係番木板箱並用生牛皮封裹極爲堅固其
在邊艙者間用口袋裝盛包紮亦甚嚴緊查因
板箱多占地位勻擺不開故有改裝口袋者衡
以斤兩亦無二致臣等始悟直隸挈獲金廣興
商船鴉片案內所起口袋卽係外夷原物也茲

自二月二十九日收起截至三月二十日計已
收繳鴉片一萬五千八百八十九箱又一千五
百四十七口袋覈之義律原報數目已逾十分
之八惟近數日來察看後船煙土較諸在先收
繳之船所載漸少雖一時未卽收完而覈計大
數恐其或有短欠當又派員持諭前赴省城夷
樓向領事義律嚴加詰責卽據稟覆伊所報數
目係在省樓覈算帳據而各船裝載鴉片開有
駛往沿海地方如潮州南澳等處者遠職再行

催回不論現泊何方半月內想可催到定必如
數盡繳斷不敢短少等語察其情詞似非虛誑
當卽准限半月責令迅速發諭往催臣等伏思
東路南澳地方屢有夷船駛至自上年驅逐淨
盡之後今春仍間有數船至長山尾等洋游奕
雖經該鎮隨時驅逐而夷船旋去旋來是否中
路分銷抑係外洋另股悉心訪察冀得端倪惟
夷人旣不肯輸情衆口亦茫無確據正思俟中
路呈繳事竣再行查辦南澳一隅以冀斷絕根

株不使稍留餘孽今據義律於無心中自行吐露是中東兩路實屬一氣相生其躉船雖在伶仃等洋而三板等船分載煙土由外洋駛往南澳覓售誠爲事所必有旣經逐層澈究斧鑿相尋正當乘此機關責成該領事將分往南澳各船一概招回悉數呈繳不但原報二萬餘箱之內不准短少一箱如此外尙有多餘亦必儘數收繳總期一律淨盡不任稍有留遺轉不責其原報失實之咎除俟收繳全完另行

奏結外所有現繳鴉片已逾十分之八並乘勢清理東路緣由謹會同廣東巡撫臣怡良粵海關監督臣豫堃恭摺由驛馳

奏伏祈

皇上聖鑒訓示再臣鄧廷楨原擬收至兩三日後先回省署辦公嗣因督率委員起剝堆貯稽查偷漏弊端未克分身回省茲收繳已有成數卽於拜摺後馳回省垣清釐應辦事宜并督飭嚴挈陸路固販吸食煙犯合併聲明謹

奏

覆奏夷商渣頓實已回國現查夥黨一併驅逐片
再臣承准軍機大臣字寄道光十九年正月二
十七日奉

上諭本日據鄧廷楨怡良奏稱論逐港腳夷商渣頓
現在下澳附船回國等語該夷渣頓來粵貿易多
年所有躉船鴉片多半係其經營實爲奸夷渠魁
現因稽查嚴密恐懼圖歸雖據該督等奏稱該夷
請牌下澳於臘月底定可開行但該夷盤踞既久
黨羽必多現在各躉船尙未回帆其所存煙泥豈

肯卽行拋棄難保不別肆詭謀著林則徐嚴密訪查該夷渣噸是否實已下澳開行確於何日起旋如尙在逗遛卽著嚴行驅逐據實覆奏務使奸夷盡去錮弊悉除方爲不負委任將此諭令知之欽此

臣查該夷渣噸於上年十二月十二日請牌下澳附搭港腳映船回國業經臣於奏報到粵摺內查明聲敘在案茲復欽奉

諭旨著臣嚴密訪查當卽欽遵密咨粵海關監督臣豫堃諭飭洋商伍紹榮等確切查稟並札澳門

同知轉諭在澳之西洋夷目唛嚟哆查明噎噸
實係何日自省到澳附搭何船於何日由澳開
行回國據實稟覆一面暗遣妥人改裝前赴澳
門密加訪問去後嗣准豫堃咨據署澳門同知
蔣立昂轉據唛嚟哆稟覆噎噸於上年十二月
十三日由省到澳卽於十六日由澳附搭港腳
映船開行回國又據洋商伍紹榮等稟同前情
與臣遣人赴澳密查均屬相符是噎噸實已於
上年十二月間搭船回國並未在省在澳逗遛

毫無疑義惟該夷販賣鴉片來粵多年誠如

聖諭盤踞既久黨羽必多所存煙泥豈肯卽行拋棄

臣先經訪得現住省城義和行之映噸卽係渣

噸之弟又映呀咄咄呀咄咄皆渣噸之外甥

並有代伊管帳之呀咄咄亦在該行居住是該

夷雖去而買賣帳目仍有人代爲經理此次義

律稟繳鴉片雖係籠統開報並未分析某夷名

下若干而躉船船戶僉稱渣噸居其大股是該

夷存積之煙不至另有囤貯

臣與督臣鄧廷楨

面商噉嘔既已逃回務當使之永不敢來方爲
善策此時煙土雖已收繳其夥黨亦必驅除如
映嘔映呀咄咄咄呀咄咄咄之類現皆給
諭洋商令與向賣鴉片著名之夷人嘔咄等一
併驅逐回國庶可杜絕奸夷蹤迹免致勾結盤
踞誘惑內地良民復貽地方之害所有遵查噉
嘔實已回國現在查明夥黨一併驅逐緣由謹
附片覆

奏伏乞

聖鑒謹

奏

會奏夷船呈繳鴉片一律收清摺

奏爲夷船呈繳鴉片現已一律收清覈較原稟之數有贏無絀恭摺

奏報仰祈

聖鑒事竊照暎咭喇等國夷人遵諭呈繳躉船鴉片

經_臣等由四百里會摺馳

奏追收逾十分之八卽乘勢清理東路亦經續行

奏明在案_臣等查粵省東路南澳一帶係與福建

漳州府屬洋面毗連該處夷船自上年驅逐開

行之後今春又據稟報有數隻駛至長山尾等
洋游奕而福建之布袋等洋近在其北聞亦有
夷船旋去旋來緣兩省交界之間逐於粵則竄
於閩逐於閩又竄於粵無非因船內載有鴉片
隨處覓售茲粵省中路躉船收繳煙土辦理既
能應手且究明中東兩路實屬一氣相生亟應
由中路而及東路並由粵洋而及閩洋務使兩
省海面一體肅清不敢稍分畛域當經臣等詣
諭喚咭喇國領事義律繕寫夷信多撥三板小

船分赴東路各洋無論粵界閩界但有夷船寄
泊卽催令駛回中路虎門與各躉船同繳煙土
仍嚴檄南澳鎮率領師船在洋堵逐並帶有通
事傳諭夷人繳煙其內港各口責令潮州鎮道
府縣嚴禁蛋艇出洋以斷夷船接濟一面飛信
知會閩省督撫臣飭屬照辦使兩省聲勢互相
聯絡適據潮州府知府易中孚稟知已奉閩浙
督臣鍾祥福建撫臣魏元烺派委漳州府知府
胡興仁至閩粵交界之分水關與易中孚面商

會辦該府等均卽遵照檄飭實力防堵水陸交
嚴夷船旣不能將鴉片發售又不能有水米接
濟勢難久泊復經該領事義律催令一體呈繳
卽據稟報陸續來至虎門查有啡喃吐船啤叻
咭船囉船皆稱從南澳駛來共繳鴉片一千六
十七箱又五百十一袋復有咧船咭噉咭船囉
嘛咭吐船皆稱從福建駛來共繳鴉片二千二
百四箱又五十七袋此數船原不在中路伶仃
等洋薐船之內每由外洋潛行竄越蹤迹靡常

今亦招至虎門與躉船一體呈繳截至四月初
六日收清合計前後所收夷人鴉片共一萬九
千一百八十七箱又二千一百一十九袋覈之
義律原稟應繳二萬二百八十三箱之數更溢
收一千袋有零據該領事等僉稱委係盡數繳
官不敢絲毫餘剩臣等於親督收繳之際節經
飭令委員每起盡一船卽將各層艙底逐一查
驗不任稍有留遺此次收繳全清夷人成本千
餘萬金已成虛擲諒不敢更尋覆轍惟現值南

風司令各國本年貿易夷船正應陸續到粵計
自彼國開船尙在數月以前未必遽信

天朝如此嚴禁其歷年來帶鴉片本已習爲故常此
次來船恐亦難免惟一時未便卽寘於法仍須
責令一併繳官臣等現又嚴諭該領事義律將
新來載貨夷船隨到隨查如無鴉片卽具保結
請驗倘有夾帶自行首繳免罪如敢朦混隱瞞
查出不許開艙驅逐回國俟奉到部行新例之
後卽當擬具檄諭底稿恭呈

御覽照會該國明示限期如屆限再有帶來應遵照
大清律例所載化外人有犯並依律科斷之語與華
民同照新例一體治罪貨物沒官始可杜其嘗
試之念臣等又思華夷雖有分界而海道處處
可通卽如閩省各洋南與粵界相連北卽距粵
甚遠是否尙有夷船在彼游奕粵省無從知悉
除再飛移閩省督撫臣一併乘機查辦外尙恐
夾帶鴉片之奸夷慮及到粵勒繳或從外洋徑
竄迤北各省寄棧售私前數年本已有此情形

此後尤不能不慮應請

敕下沿海各省一體嚴查時加防範著收繳之令隨在得行卽竄越之蹤亦永遠可杜矣至內地與販已久流毒甚深囤積之家定必不少一聞夷船鴉片盡繳正喜奇貨可居雖已力塞其源而其流尙未有艾總須趁此機會嚴緝痛懲首繳者許以自新怙惡者寘之重典務在同心協力自可禁止令行以仰副

聖主造福寰區爲民除害之至意所有夷船鴉片收

繳全清緣由謹會同廣東巡撫

臣

怡良粵海關

監督

臣

豫堃恭摺由驛馳

奏伏祈

皇上聖鑒訓示謹

奏

附奏夷人帶鴉片罪名應議專條夾片

再臣林則徐前諭夷人出具甘結聲明嗣後來船永不敢夾帶鴉片如有帶來一經查出人卽正法貨盡沒官旋據暎咭喇國領事義律稟稱本國在

天朝貿易恭蒙

大皇帝懷柔歷有二百餘年仰望先教以禁令森嚴
一 惟本國地方較遠或可姑寬期限自開船後凡有印度之港腳屬地者給予五月爲限暎國本

地者給予十月爲限然後卽以新例遵行則各人無不悉知其有此例倘有來粵者自必遵行也又云凡有諭令之處遠職自應恭遞回國以俾本國大臣呈上國主閱覽自可明知也等語覈其稟詞尙屬恭順惟甘結仍遷延未具近日復經諭催又據稟稱倘不能不取結則喚國人船無奈只得回國等情揆其用意蓋因該國公司散局悉聽夷商自行經理其中良莠不齊且海道迢遙設或因風阻滯逾期卽難保在路夷

船竟不稍有夾帶一經出結則此後奸夷帶有鴉片不但本犯罹於重法卽該領事亦不能置身事外是以心切遲疑尙非敢違法度且查該夷來粵貿易實係利市三倍不惟以該國之貨牟內地之利並以內地之貨牟各國之利蓋海外島夷之國不知名者不啻盈千累百因無力置船辦貨故不能自達於

天朝而如茶葉大黃絲斤之類則無一國不需此物
噶咭喇等國夷商所帶內地貨物非獨本國自

用尤利於分售各國得價倍蓰卽使該夷不賣鴉片專作正經貿易而其所謂三倍之利者自在以此度之其斷不肯捨卻廣東馬頭係屬實情所云只得回國者不過憚於具結強顏而出此言未必真心如是卽使果因內地法嚴不能帶賣鴉片暫時躲避回國亦於通商大局並無加損查從前每年來船不過數十隻而關稅並不短絀近年多至一百數十隻而鴉片愈以盛行且每船自夷商以至水手總不止於百人合

而計之殊嫌太衆與其多聚奸宄孰若去莠存
良卽如慣賣鴉片之啞噸噸咄等本係早經奉
旨查逐之人除啞噸已先回國外噸咄現亦驅逐其
他類此者正須一併嚴驅並令出具甘結永遠
不敢再來方爲正辦論者或恐各夷商因此裹
足殊不思利之所在誰不爭趨卽使此國不來
彼國豈肯不至縱或一年偶少次年總必加多
且聞華民慣見夷商獲利之厚莫不歆羨垂涎
以爲內地民人格於定例不准赴各國貿易以

致利藪轉歸外夷此固市井之談不足以言大義然就此察看則其不患無人經商亦已明甚矣所以鴉片之禁不但宜嚴於百姓實可倍嚴於夷商彼終年之間住內地之日甚多在該國之日轉少非獨食毛踐土且皆積聚貲財比之內地民人受

恩更重豈有予之以樂利而不可齊之以政刑者乎況所來貿易之人不過該國之一販戶並非貴戚達官卽鴉片亦皆私帶而來更非受命於其

國主且自道光十四年公司散後一切買賣均
與其國主無干此輩奸夷性貪而狡外則桀驁
夸飾內實恇怯多疑稍縱卽驕唯嚴乃肅查乾
隆年間粵省辦理暎夷洪任輝等控案動卽監
禁一二三年無敢違抗歷有成案可稽卽近年
奏辦夷案如道光二年之命犯味叮六年之命犯
嗎啼哂喃皆引名例化外有犯依律擬斷之條
處絞立決夷人無不帖服況鴉片之夾帶彼本
自知理短是以臣等此次痛加呵責不但不敢

狡辯並聞退無怨言是外夷亦有天良尙非不可教誨可否仰求

敕部將夷人帶鴉片來內地者應照化外有犯之例人卽正法貨物入官議一專條並暫時首繳免罪如何酌予限期之處奏請

諭旨通行遵辦俾得諭令各國夷人咸使懍遵嗣後自必不敢犯法似亦刑期無刑之意是否有當謹合詞附片瀝陳伏祈

聖鑒謹

奏

林文忠公政書

乙集

使粵奏稿

七

覆奏查察虎門排鍊礮臺摺

奏爲遵

旨查察虎門海口排練礮臺情形恭摺覆

奏仰祈

聖鑒事竊

臣於三月初七日在虎門舟次承准軍機

大臣字寄二月十六日奉

上諭據鄧廷楨等奏籌議虎門海口創造木排鐵鍊
添置礮臺礮位一摺已降旨允准虎門海口爲粵
海中路咽喉現當籌議海口章程自宜妥爲布置

以密巡防該督等所請於海面安設木排鐵鍊以
羈絆夷船並添設礮臺添置礮位之處是否有益
著林則徐詳細查察情形據實具奏原摺著鈔給
閱看將此諭令知之欽此伏查粵東中路海口以
虎門爲咽喉臣此次親至該處督收夷人鴉片
卽住在水師米艇寄旋海中四面形勢皆可瞭
望當經留心相度竊見重重門戶實屬險要天
成自伶仃大洋過龍穴而北兩山斜峙東曰沙
角西曰大角由此以入內洋是第一重門戶也

進口七里有一山屹立中央名曰橫檔其前有一巨石俗名飯籬排又其前小山一座曰下橫檔海道至此分爲二支其右一支多有暗沙左一支以武山爲岸武山亦謂之南山山前水深洋船出入皆由於此此第二重門戶也由橫檔再進五里則爲大虎山其西爲小虎山再西則獅子洋卽由黃埔以進省之路是大小虎山乃第三重門戶也此外如蕉門蘆灣山三門口新湧口等處港汊旁出島嶼周迴尙非夷船出入

要津姑不具論以礮臺言之先有橫檔南山兩處均係康熙五十六年所建形勢稍狹嘉慶五年於沙角添建礮臺一座二十年復就橫檔礮臺加築月臺一座又於南山礮臺之西北添建鎮遠礮臺一座各安礮四十位二十三年又於大虎山建礮臺一座安礮三十二位道光十年大角山又添礮臺一座安礮十六位迨十四年冬閒提臣關天培到粵適在驅逐夷人嘍嘍出口之後與前督臣盧坤商議以大角沙角兩

礮臺中隔海面一千數百丈之遠兩邊礮火均
恐不能得力只宜作爲望臺遇有應行防堵之
時放礮報信其南山鎮遠與橫檔三處礮臺形
如品字中隔水面三百餘丈礮火可期得力惟
南山礮臺地勢過高礮子易於冒過船頂其餘
原建牆垛亦俱單薄於道光十五年會摺

奏准將南山礮臺前面環築月臺名爲威遠又將
鎮遠橫檔大虎各礮臺加築堅厚添鑄七八千
斤大礮分別安配並於橫檔背面山麓及對岸

蘆灣山腳續添永安鞏固礮臺二座安礮四十
位二十位不等此十五年以前陸續添建礮臺
之原委也維時提臣關天培卽欲於橫檔山前
海面較狹之處創造粗大鐵鍊安根兩岸鐵鍊
之下承以木排木排兩端繫以錨纜有事則橫
絕中流無事則分披海岸如門開闔防堵益嚴
以經費未充前督臣盧坤任內未及辦理鄧廷
楨到後正與關天培商議籌辦旋於十八年夏
間有噶咭喇國夷目嗎咂喻巡船三隻窺探虎

門見海口布置森嚴畏懼竄去復經鄧廷楨與
關天培欽遵

諭旨倍謹脩防以鐵鍊木排實爲阻攔夷船要具察看威遠鎖遠橫檔各礮臺之間海面較狹安設排鍊兩道足資堵截惟威遠鎖遠兩礮臺雖同在武山腳下而相距尙有里餘排鍊旣截中流礮臺尤宜聯絡故又於威遠鎖遠中間添建大礮臺一座安放大礮六十位以護排鍊而壯聲威此鄧廷楨等現在

奏辦之情形也茲欽奉

諭旨令臣詳細查察當又移舟至武山橫檔一帶流覽登眺此處本係第二重門戶最見緊嚴其海面自西北量至東南橫寬二百七十餘丈至三百三十餘丈不等所有排鍊兩道西北皆安根於武山腳下其東南則第一道安根於飯籬排之巨石第二道安根於橫檔山腳俱各鑿深石槽以八千斤廢礮橫安槽底外加鐵箍四道上扣鐵鍊四條由四而併爲二由二而併爲一中

間紐合兩頭貫以大鐵鍊八條用大鐵鎖接扣
兩邊以便開闔其木排則以大木截齊各長四
丈五尺合四根爲一小排穿以橫木二道又以
四小排聯成一大排量寬一丈六尺餘寸面底
又各夾以橫木六道箝用大小鐵箍三十口第
一道安大排三十六排大鍊三百九丈零第二
道安大排四十四排大鍊三百七十二丈兩道
排鍊相去約九十丈共配鐵錨棕纜二百四十
副並設划船四隻水兵一百二十名管以把總

二員無事則中間常開以通出入如須防堵則關閉甚速察看木排簾紮堅固鐵鍊煅淬精融開闔亦俱得法其新建礮臺俯臨兩道排鍊正成扼吭之勢平寬六十三丈高一丈四尺五寸臺牆釘椿砌石垛牆礮洞則用三合土築成安礮六十位後圍石牆九十丈高出山巔除兵房望樓官廳軍裝火藥兩庫尙未竣工外其餘均屬完整演試銅鐵大礮礮子均能遠及對岸山根設有不應進口之夷船妄圖闖入雖遇順風

潮湧駕駛如飛一到排鍊之前勢難繞越卽謂
夷船堅厚竟能將鐵鍊衝開而越過一層尙有
一層阻攔就令都能闖斷亦已羈絆多時各臺
礮火連轟豈有不成灰燼之理似此重重布置
均極森嚴聞黃埔及十三行出入夷人行舟過
此皆凜然生嚴憚心於海防實屬有益惟排鍊
日被鹹水泡浸加以潮汐蕩搖卽木大鐵堅亦
自不能無損若有寸鐵脫扣一木離簾立刻卽
須脩復總使聯成整片百密不任一疎設或遷

就怠延則寸節偶乖卽全局爲之鬆勁查提臣
關天培於排鍊一事久已殫精竭慮寢食以之
而礮臺工程亦時時躬親督造現在文武員弁
皆極認真此後歲脩事宜均須由關天培立定
章程使將備弁兵皆諳成法加以時常操演精
熟則海防長臻鞏固邊釁永可潛消堪以仰慰
聖主廬念瀛壖之至意所有詳細查察情形謹繕摺
據實覆

奏伏乞

皇上聖鑒謹

奏

林文忠公政書

乙集

使粵奏稿

五